

ԽՈՇՈՐ ԲՈՒՐԺՈՒԱԶԻԱՅԻ ԴԵՐԻ ԱՄՐԱՊԵՌՈՒՄԸ ԹՈՒՐԳԻԱՅՈՒՄ
(1940-ԱԿԱՆ ԹՎԱԿԱՆՆԵՐ)

ՍԱՄԱՅԷԼ ԳԵՂԱՄՅԱՆ

Երկրորդ համաշխարհային պատերազմն առանձնապես նպաստավոր պայմաններ էր ստեղծել Թուրքիայում առևտրական կապիտալի զարգացման համար: Այդ ամբողջ ժամանակաշրջանում Թուրքիան առևտրական ակտիվ կապերի մեջ էր արտաքին աշխարհի հետ: Օրինակ, Գերմանիային վաճառելով հիմնականում ստրատեգիական նշանակություն ունեցող ապրանքներ, Թուրքիան միաժամանակ շարունակում էր առևտրական սերտ կապեր պահպանել ԱՄՆ-ի և Անգլիայի հետ: Վերջիններս, ձգտելով թուլացնել Թուրք-գերմանական տնտեսական կապերը, Թուրքական ապրանքների համար վճարում էին բարձր գներ: Պատերազմի հետևանքով Թուրքական հումքի նկատմամբ աճող շահագրգռվածությունը հանգեցրեց այն բանին, որ Թուրքիան արտաքին առևտրում ունեցավ ակտիվ սալտո և կուտակեց ոսկու ու վալյուտայի զգալի պաշարներ:

Թուրքական օրենսդրությունը նպաստում էր առևտրական կապիտալի զարգացմանը: Այդպիսի օրենքներից էր նաև 1944 թ. մարտին ընդունված «Առևտրի կարգավորման ու սպեկուլյացիայի դեմ պայքարի մասին» օրենքը: Այս օրենքով կառավարությունը հաստատում էր ապրանքների առավելագույն գները, որոշում էր արդյունաբերողների, մեծածախ ու մանրածախ առևտրով ղբաղվող առևտրականների շահույթի շափը, ստեղծում էր հսկիչների լայն ցանց, որոնք հետևելու էին օրենքի կատարմանը: Հիշյալ օրենքը ճանաչում էր արգյունաբերողների և առևտրականների իրավունքը՝ ստանալ 10—20%-ի շափով շահույթ. այսինքն, արդյունաբերողն իրավունք ուներ իր ապրանքը մեծածախ առևտրականներին վաճառել ինքնարժեքից 10—20% ավել գնով: Վերջիններս էլ ապրանքը վաճառում էին իրենց գնած արժեքից 10—20%-ով թանկ, իսկ մանրածախ առևտրականն էլ իր հերթին էր ավելացնում ապրանքի գինը: Այսպիսով, մինչև ապրանքը հասնում էր գնորդին, նրա գինն օրենքի հիման վրա բարձրանում էր ոչ պակաս, քան 50%-ով¹:

Ինչպես վկայում են Ստամբուլի առևտրաարդյունաբերական պալատի տվյալները, առևտրականներն այդ տարիներին ստանում էին 300—500 և անդամ մինչև 1000%-ի հասնող շահույթ²:

Թուրք հայտնի պատմաբան Հ. Բայուրը 1945 թ. հանդես գալով մեջլիսում, նշել է, որ Թուրքիայում կան ավելի քան 30—40 հազար հարուստներ,

¹ Ю. Н. Розалиев, Особенности развития капитализма в Турции, М., 1962, с. 181.

² П. П. Монсеев, Финансы Турции и положение трудящихся в годы II-й мировой войны («Ученые записки Института востоковедения АН СССР», вып. XVIII, 1959, с. 198).

որոնք իրենց հարստությունը դիզել են պատերազմի տարիներին: Ինչպես նշում էր Ն. Բայուրը, նրանցից ոմանք թեև միլիոնատերեր չէին, բայց կուտակել էին ոչ պակաս 100 հազար լիրա³:

Առևտրական կապիտալի կուտակման վկայություն կարելի է համարել մասնավոր անձանց ներդրումների աճը: Թուրք մի հեղինակի տվյալներով, մասնավոր ներդրումները 1938 թ. համեմատ 1948 թ. աճեցին մոտ չորս անգամ, այսինքն՝ 227 մլն լիրայից հասան 813 մլն-ի⁴: Այստեղ հաշվված չեն այն ներդրումները, որոնք թուրքական բուրժուազիան կատարել էր արտասահմանյան բանկերում: Բանկային գործարքների աճի մեկ այլ վկայություն կարելի է համարել հենց բանկերի ու դրանց բաժանմունքների թվի ավելացումը: Եթե դրանց թիվը 1927 թ. հավասար էր 19-ի, ապա 1948 թ.՝ 32-ի⁵:

Հիշյալ ժամանակաշրջանում Թուրքիայում զգալիորեն մեծացավ բաժնետիրական ընկերությունների դերը: Նշված երևույթը խոսում էր այն մասին, որ կապիտալիստական հարաբերությունները Թուրքիայում հասել էին խոշոր կապիտալիստական արտադրության մակարդակի: Եթե 1943 թ. Թուրքիայում կար ընդամենը 421 բաժնետիրական ընկերություն՝ 244,9 մլն լիրա կապիտալով, ապա 1950 թ. երկրում արդեն գործում էր 782 բաժնետիրական ընկերություն՝ 874,7 մլն լիրա կապիտալով⁶:

Թուրքիայում խոշոր առևտրական բուրժուազիայի ազդեցության մասին է խոսում նաև առևտրական պալատների գործունեությունը, որոնց շուրջը կենտրոնացել էին համապատասխան շրջանների առևտրականները: Այս պալատների խնդիրն էր օժանդակել առևտրի զարգացմանը, հավաքել և մշակել առևտրական ինֆորմացիան, պատրաստել վիճակագրական նյութեր, հետևել հիմնական ապրանքների շուկայական գներին, առևտրաարդյունաբերական հարցերով, առաջարկություններով, հայտարարություններով հանդես գալ միևնույն տրությունների և տեղական իշխանությունների առջև, լուծել առևտրական կոնֆլիկտները, իրենց շրջաններում բացել տոնավաճառներ և այլն: Առևտրական պալատները ղեկավարում էին խոշոր առևտրականները: Օրինակ, Ստամբուլի, Իզմիրի, Անկարայի առևտրական պալատների ղեկավարությունը գտնվում էր Թուրքիայի այնպիսի հայտնի գործարար մարդկանց ձեռքին, ինչպիսիք էին Քարամանլին, Ֆիլիբելլին, Վ. Քոչը և ուրիշները:

Ինչպես հայտնի է, առևտրական պալատները Թուրքիայում գոյություն ունեին դեռ մինչև հանրապետական կարգը, որպես կամավորական ընկերություններ: Սակայն 1925 թ. թուրքական իշխանությունները փոխել էին առևտրական պալատների գործունեության սկզբունքը և բոլոր առևտրականներին, որոնք ունեին ավելի քան 5 հազար լիրա, պարտավորեցրել էին դառնալ նոր ստեղծվող առևտրական պալատների անդամներ, որոնց գործունեությունը հսկում էր առևտրի միևնույն տրությունը: Բնականաբար, առևտրականները չէին հաշտվել իրենց իրավունքների սահմանափակման հետ և հանդես էին գալիս առևտրական գործերում պետության միջամտության դեմ ու պետական հսկո-

³ Kemal Karpat, Türk demokrasî tarihi, sosyal, ekonomik, kültürel temeller, İstanbul, 1967, s. 85.

⁴ Նույն տեղում:

⁵ "Ulus", 14. III. 1950.

⁶ Ю. Н. Розалнев, *нշվ. աշխ.*, էջ 192:

դուժյունից ազատ առևտրական պալատների ստեղծման օգտին: Առևտրականները և ձեռնարկատերերն առևտրական պալատների իրենց ներկայացուցիչների միջոցով բողոք էին հայտնում իրենց գործերին կառավարության միջամտության դեմ: Այսպես, օրինակ, Իզմիրի առևտրական պալատը 1945 թ. հանդես գալով առևտրական գործերին կառավարության միջամտության դեմ, պահանջում էր առևտրին տալ անսահմանափակ ազատություն⁷: Միլիոնատեր Վ. Քոչը, որը 1928—1951 թթ. ղեկավարում էր Անկարայի առևտրական պալատը, դրել է, որ Անկարայի, Ստամբուլի և Իզմիրի առևտրական պալատները պարբերաբար կազմակերպում էին խորհրդակցություններ և իրենց պահանջները հասցնում կառավարությանը⁸: Սա նույնպես թուրքական առևտրական բուրժուազիայի դիրքերի ուժեղացման ապացույց է:

Առևտրական կապիտալի աճի մասին պատկերացում կարող է տալ նաև որոշ խոշոր ձեռնարկատերերի և ֆիրմաների գործունեությունը: Այսպես, օրինակ, խոշոր առևտրական և արդյունաբերող Ս. Օմերն իր գործունեության սկզբում զբաղվում էր բամբակի առևտրով և 1938-ից անցել էր բամբակի վերամշակման ու տեքստիլ արտադրության ոլորտը: Նա հիմնել է մի շարք խոշոր արդյունաբերական ձեռնարկություններ ու բաժնետիրական ընկերություններ: Երկրորդ համաշխարհային պատերազմից հետո (1947) Ս. Օմերը հիմնեց «Աքքանկը»⁹:

Մյուս խոշոր ձեռնարկատերը՝ Ն. էջզաջըբաշին, կրթություն ստանալով Գերմանիայում և ԱՄՆ-ում, 1930-ական թվականների վերջերին վերադառնում է Թուրքիա՝ բժշկագիտության դիպլոմով¹⁰, Նա հիմնում է դեղանյութերի պատրաստման մի քանի լաբորատորիաներ: Ինչպես հայտնի է, դեղանյութերը պատերազմի պայմաններում իրացվում էին շատ բարձր գներով, որը և նրան հնարավորություն է տալիս 1941—1943 թթ. ընդարձակել իր ձեռնարկատիրական գործունեությունը, կառուցել կերամիկայի գործարան և մի շարք դեղագործական ձեռնարկություններ: Արդեն 1950 թ. Ն. էջզաջըբաշին դարձավ երկրի ամենախոշոր հարուստներից մեկը:

Խոշոր միլիոնատեր Վ. Քոչն իր կարիերան սկսել է հոր առևտրական կրպակից, այնուհետև զբաղվել է ռեզինի, կաշվի, կոշիկի վաճառքով, դրամական ներդրումներ է կատարել կապալային գործերի մեջ, իսկ 1938 թ. կազմակերպել է առևտրական-բաժնետիրական ընկերություն՝ 30 հազ. լիրա կապիտալով¹¹, Երկրորդ համաշխարհային պատերազմի տարիներին Վ. Քոչը զբաղվում է բեռնատար մեքենաների առևտրով, իսկ պատերազմից հետո սկսում է սերտորեն համագործակցել ամերիկյան ֆիրմաների հետ, և, վերջապես, կապիտալ ներդրումներ է կատարում նաև արդյունաբերության մեջ:

Մյուս խոշոր ձեռնարկատերը՝ Յու. Ավունդուբը, ծնվել է առևտրականի ընտանիքում¹²: Դեռ առաջին համաշխարհային պատերազմի տարիներին նա Ստամբուլում հիմնում է առևտրական ֆիրմա, կապեր է հաստատում անգլիա-

⁷ „Akşam“, 22. III. 1945.

⁸ Vehbi Koc, Hayat Hikayem, Istanbul, 1974, s. 108.

⁹ Osman Nebioglu, Türkiye'de kim kimdir, Istanbul, 1961—62, s. 526.

¹⁰ Ю. Н. Розалнев, նշվ. աշխ., էջ 213:

¹¹ Vehbi Koc, նշվ. աշխ., էջ 63:

¹² Ю. Н. Розалнев, նշվ. աշխ., էջ 227:

կան, իտալական ֆիրմաների հետ, ընտրվում է Ստամբուլի առևտրական պալատի նախագահ, 1930 թ. նրա ֆիրման տեղափոխվում է Անկարա, որտեղ նա սկսում է գործարար լայն կապեր հաստատել օտարերկրյա շատ ֆիրմաների հետ:

Թուրքիայում ամենահին առևտրական ֆիրմաներից է Բուրլա ընտանիքին պատկանող ֆիրման¹³, Բուրլաները ծագումով հրեա են, որոնք ընդունել են մահմեդականություն: Դժվար է դատողություններ անել Թուրքիայում Բուրլա ընտանիքի առևտրաարդյունաբերական գործունեության շախիրի, նրա կապերի և ազդեցության մասին, քանի որ, հաշվի առնելով Թուրքիայի ազգային բուրժուազիայի որոշ մասի հակակրանքն այլազգի բուրժուազիայի նկատմամբ, Բուրլա ընտանիքը ոչ մի կերպ չի մասսայականացնում իր գործունեությունը: Այդ պատճառով Թուրքական գրականության ու մամուլի մեջ շատ քիչ տեղեկություններ կան Բուրլա ընտանիքի վերաբերյալ: Սակայն այն փաստը, որ Բուրլաների ֆիրման գտնվում էր այն ֆիրմաների մեջ, որոնք ըստ ունևորության հարկի հարկադրված էին միլիոն լիրայով, վկայում է այս ֆիրմայի խոշորության մասին: Չնայած այն մեծ վնասին, որ նրան հասցրեց ունևորության հարկը, երկրորդ համաշխարհային պատերազմից հետո էլ Բուրլաների ֆիրման համարվում է երկրում խոշորագույններից մեկը, զբաղվում է զանազան ապրանքների ներմուծմամբ և կապիտալ ներդրումներ է կատարում արդյունաբերության մեջ:

1948 թ. ստեղծվում է «Տրանսթյուրք» ֆիրման, որը զբաղվում է մեքենաների և սարքավորումների ներմուծմամբ ու ծխախոտի, շոր մրգերի արտահանմամբ: Ֆիրմայի հիմնադիրներն էին Թ. Փիլալեն, Սուրենը և Բարադը¹⁴:

Խոշոր առևտրական կապիտալի զարգացումը հատկապես արագացավ 1950-ական թվականների սկզբներին: Ինչպես վկայում են Թուրքական տվյալները, 1950—1953 թթ. ընթացքում Թուրքիայում ստեղծվում են 101 առևտրական կազմակերպություններ՝ 136 մլն լիրա կապիտալով: Զգալիորեն ավելանում է նաև բաժնետիրական ընկերությունների թիվը, այդ տարիներին հիմնվում են 152 ընկերություններ՝ 365 մլն լիրա կապիտալով¹⁵:

Այսպիսով, երկրորդ համաշխարհային պատերազմի տարիներին և հատկապես հետպատերազմյան շրջանում Թուրքիայում տեղի էր ունենում խոշոր կապիտալի կենտրոնացման պրոցես: Այս պրոցեսին զուգընթաց կատարվում էր նաև Թուրքական խոշոր բուրժուազիայի, հատկապես առևտրական բուրժուազիայի դիրքերի ամրապնդում, որին արդեն չէր բավարարում պետության վարած պետական կապիտալիզմի քաղաքականությունը: Ինչպես հայտնի է, դեռ 1930-ական թվականներին պետական սեկտորը Թուրքիայում զգալի տնտեսական ուժ ուներ, ինչ չէր կարելի ասել մասնավոր սեկտորի մասին, որի դիրքերը դեռ բավականաչափ թույլ էին: 1930—1940-ական թվականներին երկրի զարգացումը ցույց տվեց, որ Թուրքիան շնորհիվ պետական կապիտալիզմի քաղաքականության և օտարերկրյա կապիտալի ներդրումների սահմանափակման կարողացավ հասնել որոշակի տնտեսական առաջընթաց:

¹³ Н. Г. Киреев, Национальный и иностранный капитал во внешней торговле Турции, М., 1968, с. 93.

¹⁴ Նույն տեղում:

¹⁵ „Kalkinan Türkiye“, Ankara, 1954, s. 123.

ցի, կառուցել երկրի մասշտաբով խոշոր ձեռնարկություններ, որոնք վեր էին մասնավոր սեկտորի ուժերից: Սակայն երկրորդ համաշխարհային պատերազմի տարիներին զգալիորեն ամրապնդելով իր դիրքերը, մասնավոր սեկտորն այլևս չէր ցանկանում գտնվել պետության հսկողության տակ և պահանջում էր սահմանազատել պետական ու մասնավոր սեկտորների սահմանները: Երկրի գործարար շրջանները գտնում էին, որ պետական կապիտալիզմն ապահովել է երկրի տնտեսական անկախությունը, հիմնել ազգային էկոնոմիկա և դրանով էլ ավարտել է իր պատմական դերն ու արդեն կաշկանդում է Թուրքիայի տնտեսության զարգացումը:

1948 թ. նոյեմբերի 22—27-ը Ստամբուլում տեղի ունեցավ տնտեսական կոնգրես, որը ցույց տվեց, թե ինչպիսի փոփոխություններ են կատարվել թուրքական ազգային բուրժուազիայի հայացքներում՝ պետական կապիտալիզմի նկատմամբ: Կոնգրեսում ստեղծվել էին 3 հանձնաժողովներ, որոնք զբաղվելու էին պետական կապիտալիզմի, արտաքին առևտրի և հարկային բարեփոխումների խնդիրներով¹⁶: Պետական կապիտալիզմի հանձնաժողովը պահանջում էր, որպեսզի պետությունը գործի միայն այնպիսի ոլորտներում, ինչպիսիք են կրթությունը, տրանսպորտը, ռազմական արդյունաբերությունը, փոստը և այլն: Զեռնարկատերերը պահանջում էին, որպեսզի պետությունը չմրցակցեր իրենց հետ, որ իրենք ազատ գործունեության իրավունք ստանալին և օգտվեին պետական ձեռնարկություններին տրվող արտոնություններից: Կային պահանջներ նաև այն մասին, որ պետությունը պետք է գործի միայն այնպիսի ոլորտներում, որտեղ շահ չի ապահովվում մասնավոր ձեռնարկատիրության համար և կամ երբ մասնավոր ձեռնարկատիրությունը չունի պահանջվող կապիտալը:

Արտաքին առևտրի հանձնաժողովն առաջարկում էր միջոցներ ձեռնարկել արտահանումը խրախուսելու և ներմուծումը սահմանափակելու ուղղությամբ: Հարկային բարեփոխման հանձնաժողովն էլ խորհուրդ էր տալիս վերացնել գյուղատնտեսական մթերքների վրա դրած հարկադրումները: Կոնգրեսի պատգամավորներից Ա. Քուլուչաքը գտնում էր, որ պետությունը տնտեսական գործերի ղեկավարման ժամանակ պետք է խաղա լուսավորչական դեր և անհրաժեշտության դեպքում՝ կազմակերպչական¹⁷:

Տնտեսական կոնգրեսի աշխատանքները պարզորոշ ցույց տվեցին, որ երկրի ազգային բուրժուազիայի տարբեր խմբավորումները հանդես էին գալիս պետական կապիտալիզմի որոշակի սահմանափակման օգտին, սակայն ոչ մի դեպքում կողմնակից չէին նրա վերացմանը: Պետական կապիտալիզմի ապագայի շուրջն ընթացող գաղափարական պայքարն արտահայտվեց նաև երկրի քաղաքական գործիչների ելույթներում ու գործունեության մեջ: Այդպիսի գործիչներից էր նաև Ջ. Բայարը, որը 1932—1937 թթ. զբաղեցնում էր Թուրքիայի էկոնոմիկայի մինիստրի, իսկ 1937—1939 թթ.՝ պրեմիեր-մինիստրի պաշտոնները: Ջ. Բայարը երբեք պետական կապիտալիզմի խիստ կողմնակիցներից չէր, սակայն 1930-ական թվականներին, գիտակցելով պետական սեկտորի էությունը անհրաժեշտությունը, չէր ձգտում սահմանափակել ո՛չ պետական կապիտալիզմի և ոչ էլ մասնավոր սեկտորի զարգա-

¹⁶ Karpat Kemal, նշվ. աշխ., էջ 253—254.

¹⁷ „Ulus“, 3. XII. 1948.

ցումը: Սակայն 1940-ական թվականների կեսերին նույն Ջ. Բայարը հայտարարում է իր անհամաձայնությունը՝ թուրքական իշխանությունների կիրառած պետական կապիտալիզմի քաղաքականության հանդեպ: 1945 թ. նա դուրս է գալիս կառավարող՝ ժողովրդա-հանրապետական կուսակցության շարքերից և ձեռնամուխ է լինում նոր, ընդդիմադիր՝ դեմոկրատական կուսակցության ստեղծմանը: Հիշյալ կուսակցությունը ստեղծվեց 1946 թ. հունվարի 7-ին, որի կորիզը կազմեցին խոշոր կալվածատերերը, բանկիրները, առևտրականներն ու արդյունաբերողները: «Դեմոկրատական՝ կուսակցության ղեկավարությունը,— գրում է Յ. Սերթելը,— ամենից առաջ գտնվում է այնպիսի խոշոր կալվածատերերի ձեռքին, ինչպիսիք էին Ադնան Մենդերեսը, Ջավիդ Օրալը: Դեմոկրատական կուսակցության գլխավոր թևը կազմում էին այն խոշոր կալվածատերերը, որոնք ապրում էին քաղաքում և հողագործությունից ստացված կապիտալները ներդնում էին առևտրի ու արդյունաբերության մեջ: Խոշոր բանկիրները, առևտրականներն ու արդյունաբերողները նույնպես գտնվում էին դեմոկրատական կուսակցության հիմնական կազմի մեջ»¹⁸:

Երբ 1946 թ. դեմոկրատական կուսակցությունը սկսեց գործել, նրա առաջնորդ Ջ. Բայարը, արտահայտելով թուրքական խոշոր բուրժուազիայի շահերը, հայտարարում էր, որ «պետությունը պետք է օգնի մասնավոր անձանց՝ կապիտալ ներդրումներ կատարելու խոշոր տնտեսական ձեռնարկությունների մեջ»¹⁹: Ջ. Բայարը գտնում էր, որ պետությունը պետք է պայմաններ ստեղծի մասնավոր և պետական սեկտորների զարգացման համար: «Պետական կապիտալը,— նշում էր նա,— պետք է գործի տրանսպորտի, փոստի, ռազմական արդյունաբերության և հատկապես այն բնագավառներում, որտեղ մասնավոր ձեռնարկատիրության համար շահույթ չի ապահովվում: Որոշ պետական ձեռնարկություններ էլ պետք է հանձնվեն մասնավոր սեկտորին»²⁰: Ընդ որում, Ջ. Բայարն ընդգծում էր, որ նա «հանդես է գալիս ոչ թե ամբողջ պետական կապիտալիզմի, այլ՝ նրա ծայրահեղությունների դեմ»²¹: «Լիբերալ պետական կապիտալիզմի» ոգով տոգորված այս արտահայտությունները, որոնք ասպարեզ էին իջել երկրորդ համաշխարհային պատերազմից հետո, պետք է մեկնաբանել ոչ միայն նրանով, որ երկրի ազգային բուրժուազիան հարստացել էր պատերազմի տարիներին և ցանկանում էր ազատվել պետական հսկողությունից, այլև նրանով, որ երկրի ժողովրդական մասսաների և, հատկապես, մտավորականության մեջ, է՛լ ավելի մեծ տարածում էին գտնում «ազատության ու դեմոկրատիայի» պահանջները: Գործարար շրջաններն ազատության վերաբերյալ այդ կոչերը ծառայեցնում էին իրենց շահերին, մեկնաբանելով այն որպես մասնավոր անձանց ազատություն՝ տնտեսական բնագավառում: Մասնավոր ձեռնարկատիրության գաղափարախոսներից Ա. Բաշարը, որը նախկինում պետական ծառայող էր, պնդում էր, որ

¹⁸ Sertel Yıldız, Türkiye'de ilerici akımlar ve kalkınma davamız, İstanbul, 1969, s. 65—66.

¹⁹ „Cumhuriyet“, 30. VI. 1946.

²⁰ „Tasvir“, 29. IV. 1946.

²¹ „Vatan“, 7. IV. 1947.

ազատությունը չպետք է հասկանալ միայն քաղաքական իմաստով. հասարակության մեջ պետք է ապահովվի անձի տնտեսական ազատությունը²²:

Երկրի կառավարող ժողովրդահանրապետական և ընդդիմադիր դեմոկրատական կուսակցությունների միջև մղվող միջկուսակցական պայքարը հիշյալ տարիներին հիմնականում բնութագրվում է որպես պայքար պետական կապիտալիզմի կողմնակիցների, որոնց շահերն արտահայտում էր ժողովրդահանրապետական կուսակցությունը, և պետական կապիտալիզմի հակառակորդների միջև, որոնց շահերի արտահայտիչը դեմոկրատական կուսակցությունն էր:

Իր ստեղծման առաջին իսկ օրից անհաշտ պայքար մղելով ժողովրդահանրապետական կուսակցության դեմ, դեմոկրատական կուսակցությունը 1950 թ. մայիսի 14-ի մեջլիսի ընտրություններում հաղթանակ տարավ և երկրի կառավարման ղեկը վերցրեց իր ձեռքը: Ժողովրդահանրապետական կուսակցության պարտությունը և դեմոկրատական կուսակցության հաղթանակն առանձին հեղինակներ տարբեր կերպ են մեկնաբանում: Նրանց հայացքները միայն համընկնում են այն կետում, որ ժողովրդահանրապետական կուսակցությունն իր կառավարման 27 տարիների ընթացքում չկարողացավ լուծել իր առջև ծառացած կարևոր սոցիալ-տնտեսական ու քաղաքական խնդիրները և երկիրը կանգնեցրեց փակուղու առջև՝ առաջ բերելով ժողովրդի դժգոհությունը: Ուստի պատահական չէր, որ դեմոկրատական կուսակցությունը, չնայած իր գոյատևման կարճ ժամանակահատվածին, կարողացավ հաղթանակ տանել կառավարող կուսակցության նկատմամբ:

Դեմոկրատական կուսակցության հաղթանակի դործում, անկասկած, իր դերը խաղաց ԱՄՆ-ը, որին ավելի սրտամոտ էր դեմոկրատական կուսակցության ծրագիրը, որտեղ խոստացվում էր սահմանափակել պետության միջամտությունները երկրի տնտեսական գործերում և լայն հնարավորություններ ընձեռել տեղական ու օտարերկրյա մասնավոր կապիտալի զարգացմանը:

Այսպիսով, Թուրքական խոշոր բուրժուազիան 1940-ական թվականներին զգալիորեն ամրապնդելով իր տնտեսական դիրքերը, 1950 թ. սկզբներին ձեռք բերեց նաև քաղաքական իշխանություն, որը պատահական չէր, այլ՝ երկրի զարգացման ներքին (մասամբ էլ արտաքին) տնտեսական-հասարակական ու քաղաքական գործոնների օրինաչափ հետևանք:

УКРЕПЛЕНИЕ РОЛИ КРУПНОЙ БУРЖУАЗИИ В ТУРЦИИ (1940-е годы)

САМВЕЛ ГЕГАМЯН

Резюме

Вторая мировая война создала весьма благоприятные условия для обогащения турецкой крупной буржуазии. Первые послевоенные годы

²² А. Н. Баşар, Demokrasî buhranları, İstanbul, 1956, s. 11.

характеризовались оживлением дискуссий в различных политических и экономических кругах правящего класса страны о направлениях экономической политики властей, о судьбах и путях развития государственного сектора. В спорах и высказываниях относительно государственного капитализма все отчетливее вырисовывалось усиление позиции крупной турецкой буржуазии, особенно торговой, ее стремление приступить к очередному пересмотру государственного капитализма применительно к новой ситуации, сложившейся в эти годы в самой Турции.